

D'Kindsdirn'

Mit zehn Jahr wü 's Menschl scho Kindsdirn' see.

Mit da Pupp'n spüt d'Resi geen no da Schui –
vom Aufgo' mocha hot's nämli boid g'mui.,
G'spüt hot si des Menschl bis's finsta wor'n is,
und d'Muida g'moat hot: „Zeit zum Schlofageh' is's!“

Da Resi ihr greßta Tram owa wor,
dass's fohrat mit an richtig'n Kinawog'n gor,
und a Kind'l mi'n Strampög'wond liegat drin.
So an Buim hot grad g'hobt d'Fidesserin.
Weg'n dem hot d'Resi bei ihr on'pumpat und
g'frog't ob's net voleicht Kindsdirn' see kunnt.

„Gonz virsichti fohrat i mi'n Kinawog'n,
passat guit auf, kunnt koana nix sog'n.
In Buim tat' i vohetsch'In, donn schlofat a ee.
Des g'folat ma guit und fir eam wa's schee.“
Is Wei iwalegt a wen'g, sogt donn „Jo!
Owa ob'm steht a Weda! Bist boid wieda do!

Du fohrst nur um's Ort, des is net so weit! “
D'Resi fohrt aus, sie stroiht volla Freid'.
Um's Ort fohr'n is fad, boid ko's net widasteh':
In d'Kaffeegoss'n auffe muiß's **unbedingt** geh'.
„Fohr i dur't mi'n Wag'l“, so denkt's gonz besess'n,
„Seg'n mi d'Antsch und d'Marie. Da Neid wird de fress'n!“

's dunnat und blitzt und dunnat glei wieda,
si trepföt, glei drauf geht a Woik'nbru nieda.
A schlommiga Bo is d'Kaffeegoss'n boid.
D'Resi wü hoam. Potschnoss is da Bui, eam is koid.
Da Wog'n bleibt steckta und foit in a Locka!
D'Resi ko in Buim om Krog'n grad' no pocka!

Si buss'lt und druckt eam – so schwa wir a is –
rennt hoamzui mit eam: „Mee letzte Fohrt wor des g'wiss!“
Do kimmt ihr vom Buim scho d'Muida entgeg'n:
„Oh Gott! Oh Gott! Iatzt krig' i meen Seg'n.“
's Wei schnappt in Buim, nimmt d'Res' bei da Hond
und donn rennan's hoam mi'n reg'n'noss'n G'wond.

Sie trickat in Buim o und d'Resi glei a,
sunst owa tuit's wia wonn gor nix wa.
Da Resi is leichta, weu Schimpfarei koane kimmt.
„Derf i no amoi fohr'n?“ an Onrond sie nimmt.

Mi'n Buim is de Resi boid wieda g'fohr'n,
dabei is's g'wochs'n, oiweu stoiza is's 'wor'n.
Guit g'schaut hot's om Kloan; hot eam a vog'weht.
Owa oiweu hot's auf'passt, dass jo koa Weda ob'm steht!

*Resi Birbaumer zum 80. Geburtstag
Dezember 2019*